

Fac muri effigiem, sic septa virentia crescunt.
 Quattuor, aut plures adeò Quadrangulus Hortus
 Diditur in partes, quarum Fruticeta viarum
 Castigata tamen bellè discrimina signant.
 Hic Rubus, atque uva crispa, Ribesq; nitescunt,
 Et baccis Fundum diversicoloribus ornant,
 Et rosa permulti generis, variiq; coloris.
 Sed Laterum ambages, nimiasque in Vertice cristas
 Latius ut serpunt, ad amussim aquare laborant.
 Tum Cerasi pumili, maliq; & persica nana
 Principia, Anfractusq; obeunt, finesq; viarum.
 Intus odoriferis circumdatur Area Thymbris
 Salvia & Hissopo, Ruta, Libanotide, Nardo.
 Hic Fimus ante alios, & Humum rorantia Fontis
 Ubera conquirenda tibi, vel stagna palustri
 Humida congerie, pluviis vel conflua nimbis;
 Commodius cunctos Olitor quibus irriget Hortos.
 Hic Lactuca tenet primas, mensasque coronans
 Condensante globo, varioque plicatilis Orbe
 Vel patinam caput unum implet; sed distat ab illis
 Proxima luxuria strictim cui Vimina cursum
 Sic cohibent, sese ut glomeret, foliumque recingat.
 Intybus & tardis seposita Cichoria mensis.
 Non minus in pretio est, varias mixtuar per Herbas,
 Ut Nasturtia, Gingidion, Borrago, Sinapi,
 Centaurea potens, lachrymansque Eruca salaci
 Quae Sacra est Paphia, & raphani non improba radix,
 Quae molli gaudet terrâ, graveolentia Cepe
 Et graviore etiam, mordacique Allia odore
 Et Porri assiduâ revirentia gramina Messe.
 Dulcius Asparagi genus est, quibus annua nunquam
 Debetur satio, semel à tellure recepti
 Et culti, ut fas est, reddunt sua dona quotannis.
 Petroselinum itidem nullo non tempore prodest
 Fercula, quae ingreditur, nostro condire Palato.
 Pimpinella etiam, Citrioque Melissa sapore